

- नामचीन विचारक पंडित दीनदयाल उपाध्याय री जयंती रे मौके आज वां ने सिरधा भाव सागे याद करी ज्या— उपराष्ट्रपति सीकर मांय पंडित उपाध्याय री मूरत रो अनावरण कीनो ।
- वैश्विक ब्रोकरेज कंपनी गोल्डमैन सैक्स कह्यो—भारत साल 2030 ताई तेजी ऊं बधती माली व्यवस्थावां मांय ऊं एक बणबा ओड़ी बध रह्यो है ।
- कुसुम यादव जयपुर हेरिटेज नगर निगम री कार्यवाहक महापौर रा तौर ऊं काम—काज संभाळ्यो ।
- प्रदेश मांय कठे—कठे हल्की बारिश—केई ठौड़ां पारो चढ्यो—बाड़मेर मांय दिन री बगत पारो 40 डिग्री सेल्सियस कने पूग्यो ।

000

नामचीन विचारक पंडित दीनदयाल उपाध्याय री जयंती रे मौके आज वां ने सिरधा भाव सागे याद कर्या जा रह्या है । प्रधानमंत्री नरेंद्र मोदी, गृह मंत्री अमित शाह अर रक्षा मंत्री राजनाथ सिंह पंडित उपाध्याय ने सिरधा भाव सागे याद कीना । प्रधानमंत्री सोशल मीडिया पोस्ट रे जरिये कह्यो के महान राष्ट्रवादी विचारक पंडित दीनदयाल उपाध्याय री अंत्योदय री सोच, विकसित भारत रो संकल्प सांचो करण मांय खास काम करेला । ई मौके प्रदेश मांय ई न्यारा—न्यारा कार्यक्रम राख्यी ज्या । उपराष्ट्रपति जगदीप धनखड़ सीकर रा पंडित दीनदयाल उपाध्याय शेखावाटी विश्वविद्यालय मांय पंडित उपाध्याय री मूरत रो अनावरण कीनो । राज्यपाल हरिभाऊ बागडे अर उपमुख्यमंत्री डॉ प्रेमचंद बैरवा ई जळसा मांय सिरकत कीनी । राज्यपाल हरिभाऊ बागडे जयपुर कने धानक्या मांय पंडित दीनदयाल उपाध्याय रा राष्ट्रीय स्मारक माथे सिरधा रा फूल चढ़ाया अर पंडित उपाध्याय री जिन्दगी ऊं जुड्या संग्रहालय ने देख्यो । ई मौके राज्यपाल कह्यो के पंडित दीनदयाल उपाध्याय एकात्म मानववाद री सोच सागे अंत्योदय रा विचार अर सीख ऊं जनता रा भला सारू प्रेरणा दीनी । कार्यक्रम मांय राजस्थान धरोहर बोर्ड रा अध्यक्ष ओंकार सिंह लखावत पंडित दीनदयाल उपाध्याय री जिन्दगी रा बारा मांय विचार बताया । मुख्यमंत्री भजनलाल शर्मा ई वां रा रहवास माथे पंडित दीनदयाल उपाध्याय ने वां री 108वीं जयंती रे मौके फूल चढ़ा र याद कीना । जैसलमेर मांय भाजपा रा जिला कार्यालय मांय राख्यी ज्या कार्यक्रम मांय पंडित दीन दयाल उपाध्याय ने सिरधा भाव सागे याद करी ज्या । ई मौके पाली रा मोक्षधाम मांय खुद सेवक साफ—सफाई कीनी । ।

000

वैश्विक ब्रोकरेज कंपनी गोल्डमैन सैक्स कह्यो है के भारत साल 2030 ताई तेजी ऊं बधती माली व्यवस्थावां मांय ऊं एक बणबा ओड़ी बध रह्यो है । अमरीका रा न्यूयॉर्क री ई कंपनी रे मुजब लारला कुछ बरसा मांय भारत री आमदनी मांय बधोतरी स्थिर व्ही है । मजबूत सकल घरेलू उत्पाद वृद्धि अर सकारात्मक निवेश रे कारण लाभ वृद्धि री गति साल 2030 ताई स्थिर रह सके है । कंपनी कह्यो है के निपटी री कुल आय वृद्धि अर मार्केट कैप लारला पांच साल मांय 18 फीसदी चक्रवृद्धि वार्षिक वृद्धि दर हासिल कीनी है । ई बीच मूडीज एनालिटिक्स रे मुजब माली साल 2025 मांय भारतीय अर्थव्यवस्था 7 दशमलव एक प्रतिशत री गति ऊं बधबा रो अनुमान है । वैश्विक रेटिंग्स एजेंसी—स्टैंडर्ड एंड पूअर्स ई माली साल 2024—25 सारू भारत री विकास दर 6 दशमलव आठ फीसदी रहवण रो अंदाजो लगायो है ।

000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय खास श्रृंखला चलायी ज्यी है । इण मांय आज पेश है सरकार री नुवी योजनावां अर पहल री जाणकारी—

0000

केन्द्र सरकार री खास पहल मेक इन इंडिया चलायां आज 10 साल पूरा व्हे गया । ई दौरान सरकार केई खास योजनावां लागू कीनी है । आं कामां ऊं भारत रा विनिर्माण परिदृश्य मांय क्रांति आई है अर म्हाणी माली व्यवस्था मजबूत व्ही है । प्रधानमंत्री नरेंद्र मोदी मेक इन इंडिया पहल रा दस साल पूरा व्हेवण रो स्वागत कीनो है । वे एक सोशल मीडिया पोस्ट रे जरिए कह्यो के मेक इन इंडिया भारत ने बणाई—चुणाई अर नवाचार शक्ति केंद्र बणावण रा एक सौ चालीस करोड़ भारतीयों रा सामूहिक

संकल्प रो उदाहरण है। वे लारला एक दशक ऊं ई आन्दोलन ने कामयाब बणावण मांय लगातार कोशिशं कर रह्या सगळा लोगां री सराहवणा कीनी। प्रधानमंत्री हर संभव तरीका ऊं मेक इन इंडिया ने बधावो देवण री सरकार री प्रतिबद्धता दोहरायी।

000

जयपुर हेरिटेज नगर निगम री निर्दलीय पार्षद कुसुम यादव आज निगम री कार्यवाहक महापौर रा तौर ऊं काम-काज संभाल लीनो। ई मौके जयपुर री सांसद मंजू शर्मा, विधायक गोपाल शर्मा अर बालमुकुन्दाचार्य समेत केई पार्षद अर भारतीय जनता पार्टी रा कार्यकर्ता मौजूद हा। ई मौके कुसुम यादव कह्यो के नगर निगम मांय भ्रष्टाचार खत्म करण माथे वे खास ध्यान देवेला। ध्यानजोग है के निगम रा वार्ड नम्बर-74 री पार्षद कुसुम यादव ने हेरिटेज नगर निगम री कार्यवाहक महापौर बणायी ज्यी है। पैली वाळी महापौर मुनेश गुर्जर रा निलंबन पाछे ओबीसी तबका री महिला सारू आरक्षित ई ओहदा माथे कुसुम यादव 60 दिन तांई काम कर सकेला।

000

पाकिस्तान ऊं आ र लम्बा बगत ऊं जोधपुर मांय रहवास कर रह्या 378 जणां ने भारत री नागरिकता दीरीजी है। ई मौके राज्यसभा सदस्य राजेंद्र गहलोत भारत री नागरिकता हासिल करण वाळा आं सगळा लोगां ने बधाई देता थकां वां रा उजळा भविष्य री शुभकामनावां दीनी। ई मौके विधायक देवेन्द्र जोशी अर अतुल भंसाली ई मौजूद हा।

000

पीएम श्री संस्था प्रधानां री एक दिन री आमुखीकरण कार्यशाला आज जयपुर मांय राख्यी ज्यी। ई मौके राजस्थान स्कूल शिक्षा परिषद रा आयुक्त अविचल चतुर्वेदी शिक्षा मांय नैतिक मूल्यां माथे जोर दीनो। वे कह्यो के मौजूदा दौर मांय बच्चां ने इंटरनेट रा गलत असर ऊं बचावण मांय अध्यापकां रो खास काम है। वे कह्यो के इंटरनेट माथे मौजूद नकारात्मक सामग्री बच्चां रा भविष्य ने खराब कर सके है। चतुर्वेदी कह्यो के बच्चां रा कौशल विकास ने बधावो देवणो बगत री जरूरत है। वे संस्था प्रधानां कानी ऊं करी ज्या नवाचारां री सराहवणा कीनी

000

प्रदेश रा कुछ जिलां मांय आज हल्की बिरखा व्ही। भरतपुर मांय केई दिनां पाछे कदी तेज तो कदी हल्की बरसात व्ही। बिरखा रे कारण चाल्या सीळा बायरा ऊं गर्मी ऊं साता मिली, हालांकि बरसात रे कारण पाणी भर जावण ऊं आवण'-जावण मांय परेशानी व्ही। दौसा, अजमेर, उदयपुर, डूंगरपुर अर बांसवाड़ा समेत केई जिलां ऊं ई मेह रा समाचार है। दूजी कानी बाड़मेर मांय पड़ रही तेज गर्मी बीचे आज लगातार दूजा दिन पारो 40 डिग्री सेल्सियस रे आरे-सारे दर्ज करी ज्यो। केई ठौड़ां लोग गर्मी ऊं परेशान रह्या। मौसम विभाग आवता तीन-चार दिन ऊगणी जिला मांय बिरखा रा आसार जताया है।

000

प्रदेश मांय स्वच्छता ही सेवा अभियान रा तहत प्रदेश मांय आज ई न्यारा-न्यारा कार्यक्रम राख्यी ज्या। बाड़मेर मांय खास सफाई अभियान नवो बाड़मेर रा तहत आज संवारे 8 ऊं रात 8 बज्या तांई सफाई अभियान चलायो जा रह्यो है। जोधपुर मांय केंदीय संचार ब्यूरो अर नगर-निगम दक्षिण री ओर ऊं जूना खेड़ा मिंदर मांय श्रमदान करी ज्यो। ई मौके नगर-निगम रा मुख्य निरीक्षक ललित रुपानी कह्यो के सफाई रो सीधो संबंध स्वास्थ्य ऊं है, ई कारण हर एक जणा ने सफाई राखण री आदत राखणी चाहिज। सवाईमाधोपुर मांय नेहरू-युवा-केंद्र ऊं जुड़्या माय-भारत-रा खुद सेवक राजस्थान रोड़वेज रा डिपो बस स्टैंड परिसर मांय श्रमदान कीनो। झालावाड़ मांय नाच-गाण अर गीतां रे जरिये स्कूली स्कूली विद्यार्थी साफ-सफाई राखण रो संदेश दीनो। सांस्कृतिक कार्यक्रम पाछे विद्यार्थियां ने सफाई राखण री शपथ दिरायी ज्यी। अजमेर मांय सरकारी अर गैर सरकारी स्कूलां री ओर ऊं गळी- मोहल्लां अर दूजी सार्वजनिक ठौड़ां नुक्कड़ नाटक राख र सफाई रे प्रति जाग जगायी जा रही है।

000

प्रधानमंत्री नरेन्द्र मोदी ई महीना री 29 तारीख ने आकाशवाणी ऊं प्रसारित कर्या जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित कर्या जावण वाळा ई कार्यक्रम री 114 वीं कड़ी व्हेला। आप ई आप रा विचार 27 सितंबर तांई मुफ्त नंबर 1 8 0 0 - 1 1 - 7 8 0 0 माथे भेज सको हो। ई सागे ई 1922 नम्बर माथे पर मिस्ड कॉल दे र एस. एम. एस. ऊं मिल्या लिंक रे ज़रिए ई राय दी जा सके है। नरेंद्र मोदी एप या माई जी.ओ.वी. ओपन फोरम रे जरिये ई राय दी जा सके है।

000